

四庫全書薈要

• 乾隆御覽本

集部

御選古文淵鑒卷十八目錄

漢

竇融

賁讓隗囂書

馬援

與楊廣書

朱勃

追訟馬援書

班彪

請置太子諸王官屬疏

乞優答北匈奴奏

王命論

桓譚

上時政疏

復上時政疏

杜林

論增科禁疏

張純

正昭穆疏

鄭興

日食疏

陳元

請立左氏疏

朱浮

日食疏

與彭寵書

第五倫

論竇氏疏

勸成風德疏

韋彪

置官選職疏

孔僖

上章帝自訟書

何敞

諫用竇氏疏

徐防

論五經章句疏

魯恭

諫盛夏斷獄疏

魯丕

舉賢良方正對策

論經術疏

御選古文淵鑒卷十八目錄

御選古文淵鑒卷十八

內閣學士兼禮部侍郎教習庶吉士臣徐乾學等奉

旨編注

漢

竇

融字周公扶風平陵人章武侯廣國七世孫更始時為鉅鹿太守以累世在河西知其土俗

乃將家屬而西後

歸光武封安豐侯

責讓隗囂書

融上書自通光武光武報以手詔融專心內向遣弟詣關會囂反叛

道絕乃遺書責讓之竄不納

伏惟將軍國富政修士兵懷附親遇厄會之際國家不

利之時

謂漢遭王莽篡奪也

守節不回承事本朝後遣伯春

竄子恂之

字也

委身於國無疑之誠於斯有效融等所以欣服高義

願從役於將軍者良為此也而忿悁之間

悁恚也

改節易

圖君臣分爭上下接兵委成功造難就去從議為橫謀

去從背山東也為橫通西蜀也

百年累之一朝毀之豈不惜乎殆執事

者貪功建謀以至於此融竊痛之當今西州地勢局迫

人兵離散易以輔人難以自建計若失路不反聞道猶

速不南合子陽則北走文伯耳

子陽公孫述文伯盧芳也

夫負虛交

而易強禦恃遠救而輕近敵

負亦恃也易輕也恃公孫述而輕光武也

未見

其利也融聞智者不危衆以舉事仁者不違義以要功

今以小敵大於衆何如

言危衆也

弃子微功於義何如

言違義也

且初事本朝稽首北面忠臣節也及遣伯春垂涕相送

慈父恩也俄而背之謂吏士何忍而弃之謂留子何

留子

謂見在之子對伯春故曰留也

自起兵以來轉相攻擊城郭皆為丘墟

生人轉於溝壑今其存者非鋒刃之餘則流亡之孤迄
今傷痍之恥未愈哭泣之聲尚聞幸賴天運少還而大
將軍復重於難是使積疴不得遂瘳幼孤將復流離其
為悲痛尤足愍傷言之可為酸鼻庸人且猶不忍況仁
者乎融聞為忠甚易得宜實難愛人大過以德取怨知
且以言獲罪也區區所獻惟將軍省焉

馬援

字文淵扶風茂陵人世祖即位援留西州隗
囂甚敬重之後歸世祖立功殊域封新息侯

與楊廣書

援詣洛陽陳滅囂之術因使援游說
囂諸將離其友黨又為書與囂將楊

廣云

春卿無恙

春卿揚廣字

前別冀南寂無音驛援間還長安因

畱上林竊見四海已定兆民同情而季孟

隗囂字

閉拒背

畔為天下表的

表猶標也言為標準謂射的也言背叛之罪為天下所指射也

常懼海

內切齒思相屠裂故遺書戀戀以致惻隱之計乃聞季

孟歸罪於援而納王游翁諂邪之說

游翁王元字

自謂函谷

以西舉足可定以今而觀竟何如耶援間至河內過存

伯春

存猶問也時囂子恂在帝所

見其奴吉從西方還說伯春小弟

仲舒望見吉欲問伯春無他否竟不能言曉夕號泣婉轉塵中又說其家悲愁之狀不可言也夫怨讐可刺不可毀援聞之不自知泣下也援素知季孟孝愛曾聞不過夫孝於其親豈不慈於其子可有子抱三木而跳梁妄作自同分羹之事乎季孟平生自言所以擁兵衆者欲以保全父母之國而完墳墓也又言苟厚士大夫而已而今所欲全者將破亡之所欲完者將毀傷之所欲厚者將反薄之季孟嘗折愧子陽而不受其爵

愧猶辱也今

更共陸陸

陸陸猶碌碌也

欲往附之將難為顏乎若復責以重

質當安從得子主給是哉往時子陽獨欲以王相待

謂欲

封為朔寧王也

而春卿拒之今者歸老更欲低頭與小兒曹共

槽櫪而食併肩側身於怨家之朝乎男兒欲死何傷而

拘游哉

游浮也

今國家待春卿意深宜使牛孺卿與諸耆

老大人

大人謂豪傑也

共說季孟若計畫不從真可引領去矣

前披輿地圖見天下郡國百有六所奈何欲以區區二

邦以當諸夏百有四乎春卿事季孟外有君臣之義內

有朋友之道言君臣即固當諫爭語朋友即應有切磋

豈有知其無成而但萎腰咋舌义手從俗乎

萎腰奕弱也○萎於

偽反腰乃罪反

及今成計殊尚善也過是欲少味矣

以食為喻且來

君叔

來飲字

天下信士朝廷重之其意依依常獨為西州

言援商朝廷尤欲立信於此

商度也

必不負約援不得久

畱願急賜報

朱勃

字叔陽扶風人年十二常候援兄况况方領矩步辭言嫺雅援裁知書見之自失况知其意

乃自酌酒慰援及援為將軍封侯勃不過縣令援待以舊恩而卑侮之勃愈身自親及援遇讒

惟勃能
終焉

追訟馬援書

臣聞王德聖政不忘人之功採其一美不求備於衆故
高祖赦蒯通而以王禮葬田橫大臣曠然咸不自疑夫
大將在外讒言在內微過輒記大功不計誠為國之所

慎也故章邯畏口而奔楚

章邯為秦將畏趙高讒之遂降項羽

燕將據聊

而不下

燕將攻下聊城人或讒之于燕燕將懼誅因保守聊城不敢歸

豈其甘心未規

哉悼巧言之傷類也

末規猶下計也

竊見故伏波將軍新息侯

馬援自西州欽慕聖義間關險難觸冒萬死孤立羣貴

之間傍無一言之佐馳深淵入虎口豈顧計哉寧自知

當要七郡之使徼封侯之福耶八年車駕西討隗囂國

計狐疑衆營未集援建宜進之策卒破西州及吳漢下

隴冀路斷隔惟獨狄道為國堅守士民饑困寄命漏刻

援奉詔西使鎮慰邊衆乃招集豪傑曉誘羌戎謀如涌

泉勢如轉規

規員也

遂救倒懸之急存幾亡之城兵全師

進因糧敵人隴冀略平而獨守空郡兵動有功師進輒

克銖鋤先零緣入山谷猛怒力戰飛矢貫脰又出征交

趾土多瘴氣援與妻子生訣無悔吝之心

各猶恨也

遂斬滅

徵側克平一州

南海蒼梧鬱林合浦交趾日南九真皆屬交州

間復南討立陷

臨鄉師已有業未竟而死吏士雖疫援不獨存夫戰或

以久而立功或以速而致敗深入未必為得不進未必

為非人情豈樂久屯絕地不生歸哉惟援得事朝廷二

十二年北出塞漠南渡江海觸冒害氣僵死軍事名滅

爵絕國土不傳海內不知其過衆庶未聞其毀卒遇三

夫之言橫被誣罔之讒

韓子曰龐共與太子質于邯鄲共謂魏王曰今一人言市有虎

王信乎王曰否二人言信乎王曰否三人言王信乎曰寡人信龐共曰夫市無虎明矣然三人言誠市有虎今

邯鄲去魏遠于市謗臣者過三人願王熟察之家屬杜門葬不歸墓怨隙並興

宗親怖慄死者不能自列生者莫為之訟臣竊傷之夫

明主醲於用賞約於用刑高祖嘗與陳平金四萬斤以

間楚軍不問出入所為豈復疑以錢穀間哉夫搯孔父

之忠而不能自免於讒此鄒陽之所悲也

鄒陽言曰昔者魯聽季孫

之說而逐孔子宋信子罕之計而囚墨翟夫以孔墨之辯不能自免于讒諛

詩云取彼讒人

投畀豺虎豺虎不食投畀有北有北不受投畀有昊

雅小

卷伯之篇此言欲令上天而平其惡惟陛下留思豎儒之言

無使功臣懷恨黃泉臣聞春秋之義罪以功除聖王之

祀臣有五義

禮記曰夫聖王之制祀也法施於人則祀之以死勤事則祀之以勞定國則祀之能

禦大災則祀之能捍大患則祀之

若援所謂以死勤事者也願下公卿

平援功罪宜絕宜續以厭海內之望臣年已六十常伏

田里竊感樂布哭彭越之義

彭越為梁王樂布為梁大夫使于齊越以謀反梟首

洛陽詔有收視者捕之布使還奏事越頭下祠而哭之

冒陳悲憤戰慄闕庭

書奏報歸

田里

班彪

字叔皮扶風安陵人官望都長

請置太子諸王官屬疏

時東宮初建諸王國並開而官屬未備師保多

闕彪上言

帝納之

孔子稱性相近習相遠也賈誼以為習與善人居不能
無為善猶生長于齊不能無齊言也習與惡人居不能
無惡猶生長于楚不能無楚言也是以聖人審所與居
而戒慎所習昔成王之為孺子出則周公召公太史佚

入則太顛閔天南宮括散宜生左右前後禮無違者故

成王一日即位天下曠然太平是以春秋愛子教以義

方不納于邪驕奢淫佚所自邪也詩云貽厥孫謀以燕

翼子

大雅文王有聲之篇

言武王之謀遺子孫也漢興太宗使鼂

錯導太子以法術

文帝時錯為太子家令

賈誼教梁王以詩書

誼為

梁王太傅

及至中宗亦令劉向王褒蕭望之周堪之徒以文

章之學保訓東宮以下

中宗宣帝也時元帝為太子宣帝使王褒劉向等之太子宮娛

侍太子朝夕誦讀蕭望之為太傅周堪為少傅

莫不崇簡其人就成德器今皇

太子諸王雖結髮學問修習禮樂而傅相未置賢才官屬多闕舊典宜博選名儒有威重明通政事者以為太子太傅東宮及諸王國備置官屬又舊制太子食湯沐十縣設周衛交戟五日一朝因坐東廂省視膳食其非朝日使僕中允旦旦請問而已明不媒黷廣其敬也

乞優答北匈奴奏

建武二十八年北匈奴復遣使詣闕貢馬及裘更乞和親

并請音樂又求率西域諸國胡客與俱獻見帝下三府議酬答之宜司徒掾彪奏云云帝

悉從之

臣聞孝宣皇帝勅邊守尉曰匈奴大國多變詐交接得其情則卻敵折衝應對入其數則反為輕欺今北匈奴見南單于來附懼謀其國故數乞和親又遠驅牛馬與漢合市重遣名王多所貢獻斯皆外示富強以相欺誣也臣見其獻益重知其國益虛歸親愈數為懼愈多然今既未獲助南則亦不宜絕北羈縻之義禮無不答謂可頗加賞賜略與所獻相當明加曉告以前世呼韓邪郅支行事報答之辭今必有適今立橐草并上曰單于

不忘漢恩追念先祖舊約欲修和親以輔身安國計議
甚高為單于嘉之往者匈奴數有乖亂呼韓邳支自相
讐隙並蒙孝宣皇帝垂恩救護故各遣侍子稱藩保塞
其後邳支忿戾自絕皇澤而呼韓附親忠孝彌著及漢
滅邳支遂保國傳嗣子孫相繼今南單于攜衆南向款
塞歸命自以呼韓嫡長次第當立而侵奪失職猜疑相
背數請兵將歸埽北庭策謀紛紜無所不至惟念斯言
不可獨聽又以北單于比年貢獻欲修和親故拒而未

許將以成單于忠孝之義漢東威信總率萬國日月所
照皆為臣妾殊俗百蠻義無親疎服順者褒賞畔逆者
誅罰善惡之效呼韓郅支是也今單于欲修和親款誠
已達何嫌而欲率西域諸國俱來獻見西域國屬匈奴
與屬漢何異單于數連兵亂國內虛耗貢物裁以通禮
何必獻馬裘今齎雜繒五百匹弓韃韞丸一矢四發遣
遺單于又賜獻馬左骨都侯右谷蠡王雜繒各四百匹
斬馬劍各一單于前言先帝時所賜呼韓邪等瑟空侯

皆敗願復裁賜念單于國尚未安方厲武節以戰攻為
務筭瑟之用不如良弓利劍故未以膏朕不愛小物於
單于便宜所欲遣驛以聞

王命論

王命帝王受命也時隗囂據隴右問彪
曰往者周亡戰國並爭天下分裂意者
從橫之事復起於今乎
彪乃作此論以悟之

昔在帝堯之禪曰咨爾舜天之厯數在爾躬舜亦以命
禹暨于稷契咸佐唐虞光濟四海奕世載德至于湯武
而有天下雖其遭遇異時禪代不同至於應天順人其

揆一焉是故劉氏承堯之祚氏族之世著于春秋唐據

火德而漢紹之

陶唐氏既衰其後有劉累范氏其後也范氏為晉士師魯文公世奔秦後歸于

晉其處者為劉氏帝系曰帝堯封于唐為火德漢承堯故亦以火德王

于始起沛澤則神母

夜號以彰赤帝之符

即哭白蛇事也

由是言之帝王之祚必有

明聖顯懿之德豐功厚利積累之業然後精誠通于神

明流澤加于生民故能為鬼神所福饗天下所歸往未

見運世無本功德不紀而得崛起在此位者也世俗見

高祖興於布衣不達其故以為適遭暴亂得奮其劍遊

說之士至比天下於逐鹿幸捷而得之不知神器有命不可以智力求悲夫此世之所以多亂臣賊子者也若然者豈徒闇於天道哉又不覩之於人事矣夫餓饉流隸饑寒道路

流隸謂逃流賤隸之人

思有裋褐之襲擔石之蓄所

願不過一金終於轉死溝壑何則貧窮亦有命也況乎天子之貴四海之富神明之祚可得而妄處哉故雖遭罹厄會竊其權柄勇如信布強如項籍成如王莽然卒潤鑊伏鑕烹醢分裂又況么麼不及數子而欲闇干天

位者乎是故駕蹇之乘不騁千里之塗燕雀之疇不奮

六翮之用案稅之材不荷棟梁之任

柄謂之案梁上楹謂之稅蓋小材也

○案音節稅之劣切

斗筭之子不秉帝王之重易曰鼎折足覆公

餗不勝其任也當秦之末豪傑共推陳嬰而王之嬰母

止之曰自吾為子家婦而世貧賤卒富貴不祥不如以

兵屬人事成少受其利不成禍有所歸嬰從其言而陳

氏以寧王陵之母亦見項氏之必亡而劉氏之將興也

是時陵為漢將而母獲於楚有漢使來陵母見之謂曰

願告吾子漢王長者必得天下子謹事之無有二心遂對漢使伏劍而死以固勉陵其後果定於漢陵為漢相封侯夫以匹婦之明猶能推事理之致探禍福之機全宗祀於無窮垂策書於春秋而況大丈夫之事乎是故窮達有命吉凶由人嬰母知廢陵母知興審此二者帝王之分決矣蓋在高祖其興也有五一曰帝堯之苗裔二曰體貌多奇異三曰神武有徵應四曰寬明而仁恕五曰知人善任使加之以誠信好謀達於聽受見善如

不及用人如由已從諫如順流趣時如響起當食吐哺

納子房之策拔足揮洗揖酈生之說悟戍卒之言斷懷

土之情高祖西都洛陽戍卒婁敬言不如入關據秦之固是日車駕西都長安高四皓之

名割肌膚之愛因四皓而不立趙王故曰割舉韓信於行陣收陳平

於亡命英雄陳力羣策畢舉此高祖之大略所以成帝

業也若乃靈瑞符應又可略聞矣初劉媪妊高祖而夢

與神遇震電晦冥有龍蛇之怪及長而多靈有異於衆

是以王武感物而折契高祖微時嘗從王媪武負二人賒酒既醉卧二人見其上有怪

異遂毀契
不取財

呂公覩形而進女秦王東游以厭其氣呂后

望雲而知其處始受命則白蛇分西入關則五星聚故
淮陰留侯謂之天授非人力也歷古今之得失驗行事

之成敗稽帝王之世運考五者之所謂

五者即前其興也有五

取

舍不厭斯位符瑞不同斯度而苟昧權利越次妄據外

不量力內不知命則必喪保家之主失天年之壽

趙孟過鄭

印段賦蟋蟀趙孟曰保家之主也

遇折足之凶伏斧鉞之誅英雄誠知

覺悟畏若禍戒超然遠覽淵然深識收陵嬰之明分絕

信布之覬覦距逐鹿之瞽說審神器之有授無貪不可冀為二母之所笑則福祚流於子孫天祿其永終矣

桓譚

字君山沛國相人博學多通徧習五經皆詁訓大義不為章句世祖即位大司空宋弘薦

譚拜議郎

給事中

上時政疏

時天下初平法令未定譚初言事不合至是復上疏

臣聞國之廢興在於政事政事得失由乎輔佐輔佐賢明則俊士充朝而理合世務輔佐不明則論失時宜而舉多過事夫有國之君俱欲興化建善然而政道未理

者其所謂賢者異也昔楚莊王問孫叔敖曰寡人未得
所以為國是也叔敖曰國之有是衆所惡也恐王不能
定也王曰不定獨在君亦在臣乎對曰君驕士曰士非
我無從富貴士驕君曰君非士無從安存人君或至失
國而不悟士或至饑寒而不進君臣不合則國是無從
定矣莊王曰善願相國與大夫共定國是也蓋善政者
視俗而施教察失而立防威德更興文武迭用然後政
調於時而踈人可定

踈猶動也謂踈
撓不定之人也

昔董仲舒言理國

譬若琴瑟其不調者則解而更張夫更張難行而拂衆者亡是故賈誼以才逐而鼂錯以智死世雖有殊能而終莫敢談者懼於前事也且設法禁者非能盡塞天下之姦皆合衆人之所欲也大抵取便國利事多者則可矣夫張官置吏以理萬人縣賞設罰以別善惡惡人誅傷則善人蒙福矣今人相殺傷雖已伏法而私結怨讐子孫相報後忿深前至於滅戶殄業而俗稱豪健故雖有怯弱猶勉而行之此為聽人自理而無復法禁者也

今宜申明舊令若已伏官誅而私相傷殺者雖一身逃亡皆徙家屬於邊其相傷者加常二等不得雇山贖罪漢書音義曰令甲女子犯徒遣歸家每月出錢雇人於山伐木名曰雇山如此則仇怨自解盜賊息矣夫理國之道舉本業而抑末利是以先帝禁人二業錮商賈不得宦為吏

高祖時令賈人不得衣絲乘車市井子孫不得宦為

吏此所以抑并兼長廉恥也今富商大賈多放田貨中

家子弟為之保役

中家猶中等也保役可保信也

趨走與臣僕等勤收

稅與封君比入

中家子為之保役趨走俯伏譬若臣僕也

是以衆人慕效不

耕而食至乃多通侈靡以淫耳目今可令諸商賈自相

糾告若非身力所得皆以臧畀告者如此則專役一已

不敢以貨與人事寡力弱必歸功田畝田畝修則穀入

多而地力盡矣又見法令決事輕重不齊或一事殊法

同罪異論姦吏得因緣為市所欲活則出生議所欲陷

則與死比是為刑開二門也今可令通義理明習法律

者校定科比

科謂事條
比謂類例

一其法度班下郡國蠲除故條

如此天下知方而獄無怨濫矣

書奏
不省

復上時政疏

時帝方信讖多以決定嫌疑又齎賞少薄天下不時安定譚復上疏

帝省奏愈不悅

臣前獻瞽言未蒙詔報不勝憤懣冒死復陳愚夫策謀有益於政道者以合人心而得事理也凡人情忽於見事而貴於異聞觀先王之所記述咸以仁義正道為本非有奇怪虛誕之事蓋天道性命人所難言也自子貢以下不得而聞況後世淺儒能通之乎今諸巧慧小才伎數之人增益圖書矯稱讖記

圖書即讖緯符命之類也以欺惑貪

邪誑誤人主焉可不抑遠之哉臣譚伏聞陛下窮折方

士黃白之術甚為明矣

黃白謂以藥化成金銀也

而乃欲聽納讖記

又何誤也其事雖有時合譬猶卜數隻偶之類

言偶中也

陛下

下宜垂明聽發聖意屏羣小之曲說述五經之正義畧

雷同之俗語詳通人之雅謀又臣聞安平則尊道術之

士有難則貴介冑之臣今聖朝興復祖統為人臣主而

四方盜賊未盡歸伏者此權謀未得也臣譚伏覩陛下

用兵諸所降下既無重賞以相思誘或至虜掠奪其財

物是以兵長渠率各生狐疑黨輩連結歲月不解古人

有言曰天下皆知取之為取而莫知與之為取

言先饒與之後

乃可取之陛下誠能輕爵重賞與士共之則何招而不至何

說而不釋何向而不開何征而不克如此則能以狹為廣以遲為速亡者復存失者復得矣

杜林

字伯山扶風茂陵人官至大司空

論增科禁疏

光武時羣臣上言請增科禁詔下公卿議林疏奏帝從之

夫人情挫辱則義節之風損法防繁多則苟免之行興

孔子曰道之以政齊之以刑民免而無恥道之以德齊之以禮有恥且格古之明王深識遠慮動居其厚不務多辟周之五刑不過三千大漢初興詳覽失得故破矩為圓斲雕為樸蠲除苛政更立疏網海內歡欣人懷寬德及至其後漸以滋章吹毛索疵詆欺無限詆欺謂飾非成譽非其本罪果挑菜茹之餽集以成臧臧與同小事無妨於義以為大戮故國無廉士家無完行至於法不能禁令不能止上下相遁為敝彌深臣愚以為宜如舊制不合翻移

張純

字伯仁京兆杜陵人安世四世孫官至大司空

正昭穆疏

建武初宗廟未定昭穆失序純乃與太僕朱浮共上疏云

陛下興於匹庶蕩滌天下誅鉏暴亂興繼祖宗竊以經義所紀人事衆心雖實同創革而名為中興宜奉先帝恭承祭祀者也元帝以來宗廟奉祠高皇帝為受命祖孝文皇帝為太宗孝武皇帝為世宗皆如舊制又立親廟四世推南頓君以上盡於春陵節侯

南頓令欽即光武之父春陵侯

買光武高祖也禮為人後者則為之子既事大宗則降其私親

大宗謂元帝也據代相承高祖至元帝八代光武即高祖九代孫以代數相推故繼體元帝今禘祫

高廟陳序昭穆而春陵四世君臣並列以卑廟尊不合

禮意設不遭王莽而國嗣無寄推求宗室以陛下繼統

者安得復顧私親違禮制乎昔高帝以自受命不由太

上宣帝以孫後祖不敢私親故為父立廟獨羣臣侍祠

臣愚謂宜除今親廟以則二帝舊典願下有司博採其

議詔下公卿大司徒戴涉大司空竇融議宜以宣元成

哀平五帝四世代今親廟宣元皇帝尊為祖父可親

奉祠成帝以下有司行事別為南頓君立皇考廟其祭

上至春陵節侯羣臣奉祠以明尊尊之敬親親之恩帝

之從

鄭興

字少贛河南開封人興好古學世言左氏者多祖於興終蓮勺令

日食疏

建武七年三月晦日食興疏奏多有所納

春秋以天反時為災地反物為妖人反德為亂亂則妖

災生往年以來謫咎連見意者執事頗有缺焉按春秋

昭公十七年夏六月甲戌朔日有食之傳曰日過分而

未至

言過春分而未及夏至也

三辰有災於是百官降物

素服也

君不

舉

不舉盛饌

避移時

避正寢過日食時也

樂用鼓祝用幣史用辭今孟

夏純乾用事陰氣未作其災尤重夫國無善政則謫見
日月變咎之來不可不慎其要在因人之心擇人處位
也堯知鯀不可用而用之者屈已之明因人之心也齊
桓反政而相管仲晉文歸國而任却縠者是不私其私
擇人處位也今公卿大夫多舉漁陽太守郭伋可大司
空者而不以時定道路流言咸曰朝廷欲用功臣功臣
用則人位謬矣願陛下上師唐虞下覽齊晉以成屈已
從衆之德以濟羣臣讓善之功夫日月交會數應在朔

而頃年日食每多在晦先時而合皆月行疾也日君象
而月臣象君亢急則臣下促迫故行疾也今年正月繁
霜正月夏之四月自爾以來率多寒日此亦急咎之罰書曰急恒寒若
天子賢聖之君猶慈父之於孝子也丁寧申戒欲其反
政故災變仍見此乃國之福也今陛下高明而羣臣惶
促宜畱思柔尅之政垂意洪範之法博採廣謀納羣下
之策

陳元

字長孫蒼梧廣信人父欽習左氏春秋事黎陽賈護與劉歆同時而別自名家元少傳父

業為之訓詁銳精覃思至不與鄉里通以父任為郎建武初元與桓譚杜林鄭興俱為學者所宗

請立左氏疏

時議欲立左氏傳博士范升奏以為左氏淺末不宜立元間之乃詣

闕上疏

陛下撥亂反正文武並用深愍經藝謬雜真偽錯亂每臨朝日輒延羣臣講論聖道知丘明至賢親受孔子而公羊穀梁傳聞於後世故詔立左氏博詢可否示不專已盡之羣下也今論者沉溺所習翫守舊聞固執虛言

傳受之辭以非親見實事之道左氏孤學少與

與猶黨也遂

為異家之所覆冒夫至音不合衆聽故伯牙絕絃

鍾子期死

伯牙破琴絕絃不復鼓琴

至寶不同衆好故卞和泣血

卞和得寶玉獻楚武王

王皆被刖至成王時卞和抱其璞于郊泣盡以血繼之王乃使玉尹攻之果得寶玉

仲尼聖德而

不容於世況乎竹帛餘文其為雷同者所排固其宜也

非陛下至明孰能察之臣元竊見博士范升等所議奏

左氏春秋不可立及太史公違戾凡四十五事案升等

所言前後相違皆斷截小文嫖黷微辭以年數小差掇

為巨謬遺脫纖微指為大尤抉瑕摘釁掩其弘美所謂

小辯破言小言破道者也

大戴記小辯篇孔子曰小辯破言小言破義小義破道

升等又曰先帝不以左氏為經故不置博士後主所宜

因襲臣愚以為若先帝所行而後主必行者則盤庚不

當遷於殷周公不當營洛邑陛下不當都山東也往者

孝武皇帝好公羊衛太子好穀梁有詔詔太子受公羊

不得受穀梁孝宣皇帝在人間時聞衛太子好穀梁於

是獨學之及即位為石渠論而穀梁氏興

宣帝甘露三年詔諸儒講

論五經於石渠閣

至今與公羊並存此先帝後帝各有所立不

必其相因也孔子曰純儉吾從衆至於拜下則違之夫明者獨見不惑於朱紫聽者獨聞不謬於清濁故離朱

不為巧眩移目

離朱一號離婁

師曠不為新聲易耳

衛靈公將之晉宿於

濮水之上夜聞新聲召師涓告之曰為我聽寫之曰臣得之矣遂之晉晉平公饗之酒酣靈公曰有新聲願奏之乃令師涓鼓琴未終師曠止之曰此亡國之聲也方今干戈少弭戎事畧戢畱

思聖藝眷顧儒雅採孔子下拜之義卒淵聖獨見之旨

分明黑白建立左氏解釋先聖之積結洮汰學者之累

惑洗汰猶洗濯也

使基業垂於萬世後進無復狐疑則天下幸

甚臣元愚鄙常傳師言如得以褐衣召見俯伏庭下誦

孔氏之正道理丘明之宿冤若辭不合經事不稽古退

就重誅雖死之日生之年也

書奏下其議范升復與元相辨難凡十餘上帝卒立

左氏學太常選博士四人元為第一帝以元新忿爭乃用其次司隸從事李封於是諸儒以左氏之立論議謹詳自公卿以下數廷爭之會封病卒左氏復廢

朱浮

字叔元沛國蕭人官至大司空封新息侯

日食疏

時帝以二千石長吏多不勝任有纖微之過者必見斥罷交易紛擾百姓不寧

會有日食之
異浮乃上疏

臣聞日者衆陽之所宗君上之位也凡居官治民據郡
典縣皆為陽為上為尊為長若陽上不明尊長不足則
干動三光垂示王者五典紀國家之政

五典五經也

鴻範別

災異之文皆宣明天道以徵來事者也陛下哀愍海內
新離禍毒保宥生人使得蘇息而今牧人之吏多未稱
職小違理實輒見斥罷豈不粲然黑白分明哉然以堯
舜之盛猶加三考大漢之興亦累功效吏皆積久養老

於官至名子孫因為氏姓

前書武帝時漢有天下已七十餘年為吏者長子孫居官

者以為姓號人人自愛而重犯法音義曰時無事吏不數轉至於子孫而不轉職今倉氏庫氏因以為姓即倉庫吏之後也

當時吏職何能悉理論議之徒豈不誼譁蓋以

為天地之功不可倉卒艱難之業當累日也而間者守宰數見換易迎新相代疲勞道路尋其視事日淺未足昭見其職既加嚴切人不自保各相顧望無自安之心有司或因睚眦以騁私怨苟求長短求媚上意二千石及長吏迫於舉劾懼於刺譏故爭飾詐偽以希虛譽斯

皆羣陽騷動日月失行之應夫物暴長者必夭折功卒成者必亟壞如摧長久之業而造速成之功非陛下之福也天下非一時之用也海內非一旦之功也願陛下遊意於經年之外望化於一世之後天下幸甚

帝下其議羣臣

多同於淳自是牧守易代頗簡

與彭寵書

時淳為幽州牧寵為漁陽太守淳性急寵亦負其功嫌怨轉積淳密表寵

遣吏迎妻不迎母又受貨賄多聚兵穀意計難量寵既積怨聞之怒舉兵攻淳淳書責之

寵得書愈怒

攻淳轉急

蓋聞智者順時而謀愚者逆理而動常竊悲京城太叔以不知足而無賢輔卒自棄於鄭也伯通以名字典郡有佐命之功臨民親職愛惜倉庫

伯通彭寵字名字謂聲譽也典郡謂太守

也佐命謂輔受命者

而浮秉征伐之任欲權時救急二者皆為國

耳即疑浮相譖何不詣闕自陳而為族滅之計乎朝廷之於伯通恩亦厚矣委以大郡任以威武事有柱石之

寄情同子孫之親匹夫媵母尚能致命一食

匹夫媵母皆卑賤無

職之人言感一食之惠尚能致死命以報

豈有身帶三綬職典大邦而不顧

恩義生心外叛者乎

三綬者古人兼官一官一綬也

伯通與吏民語何

以為顏行步拜起何以為容坐卧念之何以為心引鏡

窺影何以施眉目舉措建功何以為人惜乎棄休令之

嘉名造臬鵠之逆謀捐傳葉之慶祚

言寵已封侯可傳子孫也

招破

敗之重災高論堯舜之道不忍桀紂之性生為世笑死

為愚鬼不亦哀乎伯通與耿俠游俱起佐命同被國恩

俠游耿况字也况為上谷太守初與寵結謀共歸光武也

俠游謙讓屢有降挹之言

挹損也

而伯通自伐以為功高天下往時遼東有承生子

白頭異而獻之行至河東見羣豕皆白懷慚而還若以子之功論於朝廷則為遼東豕也

言朝廷之人如寵功者不少

今乃

愚妄自比六國六國之時其勢各盛廓地數千里勝兵將百萬故能據國相持多歷年所

所數也

今天下幾里列

郡幾城

幾者假設問辭言今天下非比六國時也

奈何以區區漁陽而結怨

天子此猶河濱之人捧土以塞孟津多見其不知量也方今天下適定海內願安士無賢不肖皆樂立名於世而伯通獨中風狂走自損盛時內聽驕婦之失計外信

讒邪之諛言

浮密奏寵上徵之寵既自疑其妻勸寵無應徵寵與所親信吏計議吏皆勸寵止不

徵應長為羣后惡法

羣后指功臣已封者而言惡法亦鑒戒也

永為功臣鑒戒

豈不誤哉定海內者無私讐勿以前事自疑

定海內指光武而言

前事指寵不應徵而言

願留意顧老母少弟凡舉事無為親厚者

所痛而為見讐者所快

第五倫

字伯魚京兆長陵人建武中舉孝廉拜會稽太守再遷蜀郡章帝即位代牟融為司

空

論竇氏疏

竇憲章德皇后之兄章帝世諸馬得罪歸國竇氏始貴倫上疏

臣得以空虛之質當輔弼之任素性驚怯位尊爵重拘
迫大義思自策厲雖遭百死不敢擇地又况親遇危言
之世哉今承百王之敝人尚文巧咸趨邪路莫能守正
伏見虎賁中郎將竇憲椒房之親典司禁兵出入省闈
年盛志美卑謙樂善此誠其好士交結之方然諸出入
貴戚者類多瑕釁禁錮之人尤少守約安貧之節士大
夫無志之徒更相販賣雲集其門衆煦飄山聚蚊成雷
蓋驕佚所從生也三輔論議者至云以貴戚廢錮當復

以貴戚浣濯之猶解酲當以酒也

病酒曰酲

詖險趨勢之徒

誠不可親近臣愚願陛下中宮嚴勅憲等閉門自守無妄交通士大夫防其未萌慮於無形令憲永保福祿君臣交歡無纖介之隙此臣之至所願也

勸成風德疏

倫常疾俗吏苛刻及為三公值章帝長者屢有善政乃上疏褒稱盛

美因以勸

成風德

陛下即位躬天然之德體宴宴之姿以寬弘臨下出入四年前歲誅刺史二千石貪殘者六人斯皆明聖所鑒

非羣下所及然詔書每下寬和而政急不解務存節儉而奢侈不止者咎在俗敝羣下不稱故也光武承王莽之餘頗以嚴猛為政後代因之遂成風化郡國所舉類多辦職俗吏殊未有寬博之選以應上求者也陳雷令劉豫冠軍令駟協並以刻薄之姿臨人宰邑專念掠殺務為嚴苦吏民愁怨莫不疾之而今之議者反以為能違天心失經義誠不可不慎也非徒應坐豫協亦當宜譴舉者務進仁賢以任時政不過數人則風俗自化矣

臣嘗讀書記知秦以酷急亡國又目見王莽亦以苛法
自滅故勤勤懇懇實在於此又聞諸王主貴戚驕奢踰
制京師尚然何以示遠故曰其身不正雖令不從以身
教者從以言教者訟夫陰陽和歲乃豐君臣同心化乃
成也其刺史太守以下拜除京師及道出洛陽者宜皆
召見可因博問四方兼以觀察其人諸上書言事有不
合者可但報歸田里不宜過加喜怒以明在寬臣愚不
足採

韋彪

字孟達扶風平陵人官至大鴻臚

置官選職疏

時吏多以苛刻為能又選職不必以才因盛夏多寒乃上疏

臣聞政化之本必順陰陽伏見立夏以來當暑而寒殆以刑罰刻急郡國不奉時令之所致也農人急於務而苛吏奪其時賦發充常調而貪吏割其財此其巨患也夫欲急人所務當先除其所患天下樞要在於尚書尚書之選豈可不重而間者多從郎官超升此位雖曉習文法長於應對然察察小慧類無大能宜簡嘗歷州宰

素有名者雖進退舒遲時有不逮然端心向公奉職周密宜鑒晉夫捷急之對深思絳侯木訥之功也往時楚獄大起故置令史以助郎職而類多小人好為姦利今者務簡皆可停省又諫議之職應多公直之士通才塞正有補益於朝者今或從徵試輩為大夫又御史外遷動據州郡並宜清選其任責以言績其二千石視事雖久而為吏民所便安者宜增秩重賞勿妄遷徙惟畱聖心

孔僖

字仲和魯國魯人自安國以下世傳古文尚書毛詩官臨晉令

上章帝自訟書

僖遊太學鄰房生梁郁陰上書告僖誹謗武帝譏刺當世事下

有司僖以吏捕方至恐誅乃上書自訟帝省奏立詔勿問拜僖蘭臺令史

臣之愚意以為凡言誹謗者謂實無此事而虛加誣之也至如孝武皇帝政之美惡顯在漢史坦如日月是為直說書傳實事非虛謗也夫帝者為善則天下之善咸歸焉其不善則天下之惡亦萃焉斯皆有以致之故不可以誅於人也

誅責也

且陛下即位以來政教未過而德

澤有加

言政教未
有過失也

天下所具也

言具
知也

臣等獨何譏刺哉

假使所非實是則固應悛改儻其不當亦宜含容又何

罪焉陛下不推原大數深自為計徒肆私忿以快其意

臣等受戮死即死耳顧天下之人必回視易慮以此事

闕陛下心自今以後苟見不可之事終莫復言者矣臣

之所以不愛其死猶敢極言者誠為陛下深惜此大業

陛下若不自惜則臣何賴焉齊桓公親揚其先君之惡

以唱管仲

國語齊桓公親迎管仲於郊而與之坐問焉
昔我先君襄公築臺以為高位田狩畢弋不

聽國政卑聖侮士而唯女是崇是以國家不日引不然
月長恐宗廟不掃除社稷不血食敢問為此若何
後羣臣得盡其心今陛下乃欲以十世之武帝遠諱實
事豈不與桓公異哉臣恐有司卒然見搆銜恨蒙枉不
得自叙使後世論者擅以陛下有所方比寧可復使子
孫追掩之乎謹詣闕伏待重誅

何敞

字文高扶風平陵人和帝時為尚書數切諫
言諸竇罪過憲等深惡之出為濟南太傅後

復徵遷五官中郎坐
詐病抵罪卒於家

諫用竇氏疏

時太后兄竇憲以車騎將軍擊匈
奴詔使者為憲弟衛尉篤奉車都

尉景大起却第興造勞役百姓愁苦敬上疏切諫不報敬為尚書復上封事

夫忠臣憂世犯主嚴顏譏刺貴臣至以殺身滅家而猶為之者何邪君臣義重有不得已也臣伏見往事國之危亂家之將凶皆有所由較然易知昔鄭武姜之幸叔段衛莊公之寵州吁愛而不教終至凶戾由是觀之愛子若此猶饑而食之以毒適所以害之也伏見大將軍竇憲始遭大憂公卿比奏欲令典幹國事比類也憲深執謙退固辭盛位懇懇勤言之深至天下聞之莫不

悅喜今踰年無幾大禮未終卒然中改兄弟專朝憲秉

三軍之重篤景總宮衛之權而虐用百姓奢侈僭誅

戮無罪肆心自快今者論議洶洶咸謂叔段州吁復生

於漢臣觀公卿懷持兩端不肯極言者以為憲等若有

匪懈之志則已受吉甫褒申伯之功

申伯周宣王元舅也有令德故尹吉

甫作頌如憲等陷於罪辜則自取陳平周勃順呂后之

權

呂后欲封呂祿呂產為王陳平周勃順旨而封之呂后崩平勃合謀卒誅產祿也

終不以憲

等吉凶為憂也臣敬區區誠欲計策兩安絕其綿綿塞

其涓涓

周金人銘曰涓涓不壅終為江河綿綿不絕或成網羅

上不欲令皇太后

損文母之號陛下有誓泉之譏

左傳鄭莊公實姜氏於城賴誓之曰不及黃泉

無相見也

下使憲等得長保其福祐然臧獲之謀上安主父

下存主母猶不免於嚴怒

臧獲奴婢賤稱也史記蘇秦謂燕王曰客有遠為吏其妾

私人其夫將來妻作藥酒待之夫至妻使妾舉藥酒而進之妾欲言則恐逐其主母也欲勿言則恐殺其主父於是伴僮而棄酒主父怒笞之故妾僮而覆酒上存主父下存主母然終不免於笞

臣伏惟累祖

蒙恩至臣八世

自膠東相成至敬凡八世

復以愚陋旬年之間歷顯

位備機近每念厚德忽然忘生雖知言必夷滅而冒死

自盡者誠不忍目見其禍而懷默苟全駙馬都尉瓌雖存弱冠有不隱之忠比請退身願抑家權可與參謀聽順其意識宗廟至計竇氏之福

徐防

字謁卿沛國鉅人官至太尉安帝時以災異策免

五經章句疏

防以五經久遠聖意難明宜為章句以悟後學乃上疏詔從之

臣聞詩書禮樂定自孔子發明章句始於子夏其後諸家分析各有異說漢承亂秦經典廢絕本文畧存或無章句收拾闕遺建立明經博徵儒術開置太學孔聖既

遠微旨將絕故立博士十有四家

易有施孟梁邱賀京房書有歐陽和伯夏

侯勝建詩有申公轅固韓嬰春秋有嚴彭祖

設甲乙之

顏安樂禮有戴德戴勝光武時立十四博士

科歲課甲科四十人為郎中乙科二十人為太子舍人丙科四十人補文學掌故

以勉勸學者

所以示人好惡改敝就善者也伏見太學試博士弟子

皆以意說不修家法私相容隱開生奸路每有策試輒

興諍訟論議紛錯互相是非孔子稱述而不作又曰吾

猶及史之闕文疾史有所不知而不肯闕也今不依章

句妄生穿鑿以遵師為非義意說為得理輕侮道術寢

以成俗誠非詔書實選本意改薄從忠三代常道專精
務本儒學所先臣以為博士及甲乙策試宜從其家章
句開五十難以試之解釋多者為上第引文明者為高
說若不依先師義有相伐伐謂自相攻伐也皆正以為非五經
各取上第六人論語不宜射策雖所失或久差可矯革

魯恭

字仲康扶風平陵人章帝時拜中
牟令專以德化為理官至司徒

諫盛夏斷獄疏

初和帝末夏令麥秋得案驗薄
刑而州郡好以苛察為政因遂

盛夏斷獄

恭上疏諫

臣伏見詔書敬若天時憂念萬民為崇和氣罪非殊死
且勿案驗進柔良退貪殘奉時令所以助仁德順昊天
致和氣利黎民者也舊制至立秋乃行薄刑自永元十
九年以來改用孟夏而刺史太守不深惟憂民息事之
原進良退殘之化因以盛夏徵召農人拘對考驗連滯
無已司隸典司京師四方是則而近於春月分行諸部
託言勞來貧人而無隱惻之實煩擾郡縣廉考非急速
捕一人罪延十數上逆時氣下傷農業案易五月始用

事經曰后以施令誥四方言君以夏至之日施命令止
四方行者所以助微陰也行者尚止之況於逮召考掠
奪其時哉比年水旱傷稼人饑流冗冗散也今始夏百穀
權輿陽氣胎養之時自三月以來陰寒不暖物當化變

而不被和氣月令孟夏斷薄刑出輕繫行秋令則苦雨

數來五穀不熟又曰仲夏挺重囚益其食

挺猶寬也

行秋令

則草木零落人傷於疫夫斷薄刑者謂其輕罪已正不
欲令久繫故時斷之也臣愚以為今孟夏之制可從此

令其決獄案考皆以立秋為斷以順時節育成萬物則天地以和刑罰以清矣

魯丕

字叔陵扶風平陵人恭之弟兼通五經以魯詩尚書教授為當世名儒累官侍中左中郎

將再為

三老

舉賢良方正對策

章帝建初元年詔舉賢良方正大司農劉寬舉丕時對策

者百餘人惟

丕在高第

政莫先於從民之所欲除民之所惡先教後刑先近後遠君為陽臣為陰君子為陽小人為陰京師為陽諸夏

為陰男為陽女為陰樂和為陽憂苦為陰各得其所則和調精誠之所發無不感決吏多不良在於賤德而貴功欲速莫能修長久之道古者貢士得其人者有慶不得其人者有讓是以舉者務力行選舉不實咎在刺史二千石書曰天工人其代之觀人之道幼則觀其孝順而好學長則觀其慈愛而能教說難以觀其謀煩事以觀其治窮則觀其所守達則觀其所施此所以核之也民多貧困者急急則致寒寒則萬物多不成去本就末

奢所致也制度明則民用足刑罰不中則於名不正正名之道所以明上下之稱班爵祿之制定卿大夫之位也獄訟不息在爭奪之心不絕法者民之儀表也法正則民慤吏民凋敝所從久矣不求其本浸以益甚吏政多欲速又州官秩卑而任重競為小功以求進取生凋弊之俗救弊莫若忠孔子曰孝慈則忠治姦詭之道必明慎刑罰孔子曰導之以禮樂而民和睦以犯難民忘其死死且忘之況使為禮義乎

論經術疏

和帝召見諸儒丕與賈逵等相難數事帝善丕說特賜冠幘履襪衣一襲

丕因上疏

臣以愚頑顯備大位犬馬氣衰猥得進見論難於前無所甄明衣服之賜誠為優過臣聞說經者傳先師之言非從己出不得相讓相讓則道不明若規矩權衡之不可枉也難者必明其據說者務立其義浮華無用之言不陳於前故精思不勞而道術愈章法異者各令自說師法博觀其義覽詩人之旨意察雅頌之始終明舜禹

臯陶之相戒顯周公箕子之所陳觀乎人文化成天下
陛下既廣納謇謇以開四聰無令芻蕘以言得罪既顯
巖穴以求仁賢無使幽遠獨有遺失



御選古文淵鑒卷十八



總校官庶吉士臣張能照

校對官助教臣汪錫魁

膳錄監生臣沈浩

欽定四庫全書薈要

集部

御選古文淵鑒卷十九

御選古文淵鑒卷十九目錄

漢



文帝紀贊

武帝紀贊

昭帝紀贊

成帝紀贊

諸侯王表序

高惠高后文帝功臣表序

外戚恩澤侯表序

公孫弘卜式兒寬傳贊

司馬遷傳贊

公孫賀劉屈氂車千秋王訢楊敞蔡義陳萬年鄭

弘等傳贊

循吏傳序

貨殖傳序

游俠傳序

西域傳贊

崔駰

誠實憲書

樊準

勸興儒學疏

陳忠

論喪服疏

容諫疏

言中使疏

翟醕

諫外戚疏

虞詡

請復三郡疏

左雄

上順帝陳吏事疏

郎顗

上災異封事

御選古文淵鑒卷十九目錄

御選古文淵鑒卷十九

內閣學士兼禮部侍郎教習庶吉士臣徐乾學等奉

旨編注

漢

班固

字孟堅彪之子九歲能屬文誦詩賦及長博貫載籍九流百家之言無不窮究以父彪所

續前史未詳乃探撰前記綴集所聞以為漢書學者莫不誦誦焉初除蘭臺令史遷為郎坐竇

憲賓客收繫死獄中

文帝紀贊

孝文皇帝即位二十三年宮室苑囿車騎服御無所增

益有不便輒弛以利民

弛廢弛。式爾反。

嘗欲作露臺召匠計

之直百金上曰百金中人十家之產也吾奉先帝宮室

常恐羞之何以臺為身衣弋絺

弋黑色也。絺厚。贈○大奚反。

所幸慎

夫人衣不曳地帷帳無文繡以示敦樸為天下先治霸

陵皆瓦器不得以金銀銅錫為飾因其山不起墳南越

尉佗自立為帝召貴佗兄弟以德懷之佗遂稱臣與匈

奴結和親後而背約入盜令邊備守不發兵深入恐煩
百姓吳王詐病不朝賜以几杖羣臣袁盎等諫說雖切
常假借納用焉張武等受賄金錢覺更加賞賜以媿其
心專務以德化民是以海內殷富興於禮義斷獄數百
幾致刑措嗚呼仁哉

武帝紀贊

漢承百王之弊高祖撥亂反正文景務在養民至於稽
古禮文之事猶多闕焉孝武初立卓然罷黜百家
謂諸

子雜說違背六經

表章六經遂疇咨海內舉其俊茂

疇誰也咨謀也言謀

於衆人誰可為事者也

與之立功興太學修郊祀改正朔定厯數

正之成反

協音律作詩樂建封禪

禮禪同

禮百神紹周後號令

文章煥焉可述後嗣得遵洪業而有三代之風如武帝之雄材大畧不改文景之恭儉以濟斯民雖詩書所稱何有加焉

昭帝紀贊

昔周成以孺子繼統而有管蔡四國流言之變孝昭幼

年即位亦有燕蓋上官逆亂之謀成王不疑周公孝昭
委任霍光各因其時以成名大矣哉承孝武奢侈餘敝
師旅之後海內虛耗戶口減半光知時務之要輕繇薄
賦與民休息繇讀曰徭至始元元鳳之間匈奴和親百姓充
實舉賢良文學問民所疾苦議鹽鐵而罷榷酤尋號曰
昭不亦宜乎

成帝紀贊

臣之姑充後宮為婕妤

班彪之姑也

父子昆弟侍帷幄數為

臣言成帝善修容儀升車正立不內顧不疾言不親指
臨朝淵嘿尊嚴若神可謂穆穆天子之容者矣博覽古
今容受直辭公卿稱職奏議可述遭世承平上下和睦
然湛於酒色湛讀日孰趙氏亂內外家擅朝言之可為於邑
於邑短氣貌○於音烏建始以來王氏始執國命哀平短祚莽遂
篡位蓋其威福所由來者漸矣

諸侯王表序

昔周監於二代三聖制法

三聖謂文王武王及周公也

立爵五等封

國八百同姓五十有餘周公康叔建於魯衛各數百里

太公於齊亦五侯九伯之地

五侯五等諸侯也九伯九州之伯也

詩載其

訓曰介人維蕃大師維垣大邦維屏大宗維翰懷德維

寧宗子維城毋俾城壞毋獨斯畏

大雅板之詩

所以親親賢

賢褒表功德關諸盛衰深根固本為不可拔者也故盛

則周邵相其治致刑錯衰則五伯扶其弱與其守自幽

平之後日以陵夷至虜阮隰河洛之間

阮者狹也隰者迫強

秦東有韓魏數見侵暴踣蹶不安也○阮於懈反隰音區

分為二周

謂東西二周也

有逃責

之臺被竊鈇之言

周赧王負責無以歸之主迫責急乃逃於此臺後人因以名之洛陽南宮

詔臺是也周室衰微政令不行於天下雖有鈇鉞無然所用之是謂私竊隱藏之耳○被皮義反詔音移

天下謂之共主

雖至微弱猶彊大弗之敢傾言諸侯雖共以為之主

敢傾滅周也

歷載八百餘年數極德盡既於王赧

既亦降為

庶人用天年終號位已絕於天下尚猶枝葉相持莫得

居其虛位海內無主三十餘年秦據執勝之地騁狙詐

之兵蠶食山東壹切取勝因矜其所習自任私知姍笑

三代盪滅古法

姍古訕字音刪

竊自號為皇帝而子弟為匹

夫內亡骨肉本根之輔外亡尺寸藩翼之衛陳吳奮其
白挺劉項隨而斃之故曰周過其歷秦不及期國執然
也

應劭曰武王克商卜世三十卜年七百今乃三十六世八百六十七歲此所謂過其歷也

漢興之

初海內新定同姓寡少懲戒亡秦孤立之敗於是剖裂
疆土立二等之爵

漢封功臣大者王小者侯也

功臣侯者百有餘邑

尊王子弟大啓九國自鴈門以東盡遼陽為燕代常山
以南太行左轉度河濟漸於海為齊趙殺泗以往奄有
龜蒙為梁楚東帶江湖薄會稽為荆吳北界淮潁略廬

衡為淮南波漢之陽亘九疑為長沙

波讀如波
澤之陂

諸侯比

境周市三垂外接胡越

北謂相接次也
垂謂北東南也

天子自有三

河東郡潁川南陽

三河河東河
南河內也

自江陵以西至巴蜀北

自雲中至隴西與京師內史凡十五郡公主列侯頗邑

其中而藩國大者夸州兼郡連城數十宮室百官同制

京師可謂橋枉過其正矣

橋與矯同言矯秦孤立之敗
而大封子弟過於強盛有失

中雖然高祖創業日不暇給孝惠享國又淺高后女主

攝位而海內晏如亡狂狡之憂卒折諸呂之難成太宗

之業者亦賴之於諸侯也然諸侯原本以大末流濫以

致溢小者淫荒越法大者睽孤橫逆以害身喪國

睽孤乖刺

之意故文帝采賈生之議分齊趙景帝用鼂錯之計削吳

楚武帝施主父之冊下推恩之令使諸侯王得分戶邑

以封子弟不行黜陟而藩國自析自此以來齊分為七

謂齊城陽濟北濟南淄川膠西膠東

趙分為六

謂趙平原真定中山廣川河間

梁分為五

謂梁濟川濟東

淮南分為三

謂淮南衛山廬江

皇子始立者大國

東山陽濟陰

不過十餘城長沙燕代雖有舊名皆亡南北邊矣景遭

七國之難抑損諸侯減黜其官武有衡山淮南之謀作

左官之律

仕於諸侯為左官絕不得使仕於王朝也人道上下今舍天子而仕諸侯故謂之左官也

設附益之法

附益之法禁其背正法而厚於私家也

諸侯惟得衣食稅租

不與政事至於哀平之際皆繼體苗裔親屬疎遠生於

帷牆之中不為士民所尊執與富室亡異而本朝短世

國統三絕

謂成哀平皆早崩又無繼嗣

是故王莽知漢中外殫微本

末俱弱亡所忌憚生其姦心因母后之權假伊周之稱

顓作威福廟堂之上不降階序而運天下詐謀既成遂

據南面之尊分遣五威之吏馳傳天下班行符命漢諸侯王厥角韻首韻與稽同奉上璽韞惟恐在後或廼稱美頌德以求容媚豈不哀哉是以究其終始彊弱之變明監戒焉

高惠高后文帝功臣表序

自古帝王之興曷嘗不建輔弼之臣所與共成天功者乎漢興自秦二世元年之秋楚陳之歲謂陳涉自稱楚王時也初

以沛公總帥雄俊三年然後西滅秦立漢王之號五年

東克項羽即皇帝位八載而天下廼平始論功而定封

訖十二年侯者百四十有三人時大城名都民人散亡

戶口可得而數裁什二三是以大侯不過萬家小者五

六百戶封爵之誓曰使黃河如帶泰山若厲國以永存

爰及苗裔

帶衣帶也厲砥厲石也河當何時如衣帶山當何時如厲石言如帶厲國猶永存以及後

世之子孫也

於是申以丹書之信重以白馬之盟

謂刑白馬歃其血以

為盟也

又作十八侯之位次

謂蕭何曹參張敖周勃樊噲酈商奚涓夏侯嬰灌嬰傅寬

靳歙王陵陳武王吸薛歐周昌丁復蟲達也

高后二年復詔丞相陳平盡差

列侯之功錄第下竟臧諸宗廟副在有司

副貳之本始入在有司

未嘗不欲固根本而枝葉稍落也故逮文景四五世間
流民既歸戶口亦息列侯大者至三四萬戶小國自倍
富厚如之子孫驕逸忘其先祖之艱難多陷法禁隕命
亡國或云子孫訖於孝武後元之間靡有子遺耗矣俗語
謂無為耗罔亦少密焉故孝宣皇帝愍而錄之乃開廟
臧覽舊籍詔令有司求其子孫咸出庸保之中竝受復
除或加以金帛用彰中興之德降及孝成復加卹問稍

益衰微不絕如綫善乎杜業之納說也曰昔唐以萬國

致時雍之政虞夏以之多羣后饗共已之治同共恭湯法

三聖殷氏太平三聖謂堯舜禹也周封八百重譯來賀是以內

恕之君樂繼絕世隆名之主安立亡國以立亡國之後為安泰也至

於不及下車德念深矣謂武王入殷未及下車封黃帝之後于薊虞舜之後于陳也

成王察牧野之克顧羣后之勤知其恩結於民心功光

於王府也故追述先父之志錄遺老之策高其位大其

寓寓謂啓土所居也愛敬飭盡命賜備厚大孝之隆於是為至

至其沒也世主嘆其功無民而不思所息之樹且猶不
伐况其廟乎是以燕齊之祀與周並傳子繼弟及歷載
不墮豈無刑辟繇祖之竭力故支庶賴焉言國家非無刑辟而功臣
子孫得不陷罪辜者思其先人之力令有續嗣也迹漢功臣亦皆割符世爵受

山河之誓存以著其號亡以顯其魂賞亦不細矣百餘
年間而襲封者盡或絕失姓或乏無主朽骨孤於墓苗

裔流於道生為愍隸死為轉屍

愍隸言為徒隸可哀愍也死不能葬故屍流轉

在溝壑之中

以往况今甚可悲傷聖朝憐閔詔求其後四方

忻忻靡不歸心出入數年而不省察恐議者不思大義

設言虛亡則厚德掩息遴東布章

遴讀與各同難行也東古簡字少也言今

難行封則得繼絕者少若然必布聞彰於天下也

非所以視化勸後也三人為

衆雖難盡繼宜從尤功於是成帝復紹蕭何哀平之世增修曹參周勃之屬得其宜矣以綴續前記究其本末并序位次盡於孝文以昭元功之侯籍云

外戚恩澤侯表序

自古受命及中興之君必興滅繼絕修廢舉迺然後天

下歸仁四方之政行焉傳稱武王克殷追存賢聖至乎
不及下車世代雖殊其揆一也高帝撥亂誅暴庶事草
創日不暇給然猶修祀六國求聘四皓過魏則寵無忌
之墓適趙則封樂毅之後及其行賞而授位也爵以功
為先後官用能為次序後嗣共已遵業舊臣繼踵居位
至乎孝武元功宿將略盡會上亦興文學進拔幽隱公
孫弘自海濱而登宰相於是寵以列侯之爵又疇咨前
代詢問耆老初得周後復加爵邑自是之後宰相畢侯

矣元成之間晚得殷世以備賓位漢興外戚與定天下

侯者二人

呂后兄周呂侯
澤建成侯釋之

故誓曰非劉氏不王若有亡

功非上所置而侯者天下共誅之是以高后欲王諸呂

王陵廷爭孝景將侯王氏脩侯犯色

脩侯周亞夫也○脩音條

卒用

廢黜是後薄昭竇嬰上官衛霍之侯以功受爵其餘后

父據春秋褒紀之義

春秋天子將納后於紀紀本子爵也故先褒為侯言王者不取於小

國帝舅緣大雅申伯之意

申伯周宣王元舅也為邑於謝後世欲光寵外親者緣申

伯之恩援此義以為喻也

寢廣博矣是以別而敘之

公孫弘卜式兒寬傳贊

公孫弘卜式兒寬皆以鴻漸之翼困於燕爵

易漸卦上九爻辭曰

鴻漸于陸其羽可用為儀喻弘等皆有鴻之羽儀未進之時燕爵所輕也

遠迹羊豕之間遠

其迹也

非遇其時焉能致此位乎是時漢興六十餘載海

內艾安

艾讀曰又

府庫充實而四夷未賓制度多闕上方欲

用文武求之如弗及始以蒲輪迎枚生見主父而歎息

謂言公皆安在何相見之晚

羣士慕嚮異人並出卜式拔於芻牧弘

羊擢於賈豎衛青奮於奴僕日磬出於降虜斯亦曩時

版築飯牛之朋已

版築傳說也飯牛甯戚也

漢之得人於茲為盛儒

雅則公孫弘董仲舒兒寬篤行則石建石慶質直則汲

黯卜式推賢則韓安國鄭當時定令則趙禹張湯文章

則司馬遷相如滑稽則東方朔枚臯

滑稽轉利之稱也滑亂也稽礙也言

其變亂無畱礙也

應對則嚴助朱買臣歷數則唐都洛下閎協

律則李延年運籌則桑弘羊奉使則張騫蘇武將率則

衛青霍去病受遺則霍光金日磾其餘不可勝紀是以

興造功業制度遺文後世莫及孝宣承統纂修洪業亦

講論六藝招選茂異而蕭望之梁丘賀夏侯勝韋玄成
嚴彭祖尹更始以儒術進劉向王褒以文章顯將相則
張安世趙充國魏相丙吉于定國杜延年治民則黃霸
王成龔遂鄭弘召信臣召讀曰邵韓延壽尹翁歸趙廣漢嚴
延年張敞之屬皆有功迹見述於世參其名臣亦其次
也

司馬遷傳贊

自古書契之作而有史官其載籍博矣至孔氏纂之纂與

撰上繼唐堯下訖秦繆唐虞以前雖有遺文其語不經

故言黃帝顓頊之事未可明也及孔子因魯史記而作

春秋而左丘明論輯其本事以為之傳又纂異同為國

語又有世本錄黃帝以來至春秋時帝王公侯卿大夫

祖世所出春秋之後七國並爭秦兼諸侯有戰國策漢

興伐秦定天下有楚漢春秋故司馬遷據左氏國語采

世本戰國策述楚漢春秋接其後事訖於天漢其言秦

漢詳矣至於采經撫傳撫拾也○分散數家之事甚多

之亦反

疏略或有抵牾

抵觸也牾讀曰逆相支柱不安也

亦其涉獵者廣博貫

穿經傳馳騁古今上下數千載間斯以勤矣又其是非

頗繆於聖人論大道則先黃老而後六經序遊俠則退

處士而進姦雄述貨殖則崇執利而羞賤貧此其所蔽

也然自劉向揚雄博極羣書皆稱遷有良史之材服其

善序事理辨而不華質而不俚其文直其事核不虛美

不隱惡故謂之實錄烏呼以遷之博物洽聞而不能以

知自全既陷極刑幽而發憤書亦信矣

言其報任安述書自陳已志

其所以自傷悼小雅巷伯之倫

巷伯，魯官也。遇讒而作詩。

夫唯大雅

既明且哲，能保其身，難矣哉！

大雅，燕民之詩。

公孫賀劉屈氂車千秋王訢楊敞蔡義陳萬年

鄭弘等傳贊

所謂鹽鐵議者，起始元中徵文學賢良問以治亂，皆對願罷郡國鹽鐵酒榷均輸務本抑末，毋與天下爭利。然後教化可興，御史大夫弘羊以為此乃所以安邊竟制四夷國家大業不可廢也。當時相詰難頗有其議文至

宣帝時汝南桓寬次公

次公寬之字

治公羊春秋舉為郎至

廬江太守丞博通善屬文推行鹽鐵之議增廣條目極

其論難著數萬言亦欲以究治亂成一家之法焉其辭

曰觀公卿賢良文學之議異乎吾所聞聞汝南朱生言

當此之時英俊並進賢良茂陵唐生文學魯國萬生之

徒六十有餘人咸聚闕庭舒六藝之風陳治平之原知

者贊其慮仁者明其施勇者見其斷辯者駟其辭斷斷

焉行行焉

斷斷辯爭之貌行行剛彊之貌○斷牛斤反行胡浪反

雖未詳備斯可

略觀矣中山劉子推言王道橋當世反諸正

正曲曰橋

彬彬

然弘博君子也九江祝生奮史魚之節發憤懣譏公卿

介然直而不撓可謂不畏彊圉矣桑大夫據當世合時

變上權利之略雖非正法鉅儒宿學不能自解

解釋也言理不

出於弘羊也

博物通達之士也然攝公卿之柄不師古始放

於末利

放縱也謂縱心於利也

處非其位行非其道果隕其性以

及厥宗車丞相履伊呂之列當軸處中括囊不言容身

而去

括結也易坤卦六四爻辭曰括囊无咎無譽言自閑慎如囊之括結也

彼哉彼哉若

夫丞相御史兩府之士不能正議以輔宰相成同類長同行阿意苟合以說其上斗筭之徒何足選也

循吏傳序

漢興之初反秦之敝與民休息凡事簡易禁罔疎濶而相國蕭曹以寬厚清靜為天下帥

帥遵也

民作畫一之歌

民歌曰蕭何為法較若畫一曹參代之守而勿失

孝惠垂拱高后女主不出房

闥而天下晏然民務稼穡衣食滋殖至於文景遂移風易俗是時循吏如河南守吳公蜀守文翁之屬皆謹身

帥先居以廉平不至於嚴而民從化孝武之世外攘四夷內改法度民用彫敝奸軌不禁

言不可禁

時少能以化治

稱者唯江都相董仲舒內史公孫弘兒寬居官可紀三人皆儒者通於世務明習文法以經術潤飾吏事天子器之仲舒數謝病去弘寬至三公孝昭幼冲霍光秉政承奢侈師旅之後海內虛耗光因循守職無所改作至於始元元鳳之間匈奴鄉化百姓益富舉賢良文學問民所疾苦於是罷酒榷而議鹽鐵矣及至孝宣繇仄陋

而登至尊興於閭閻知民事之艱難自霍光薨後始躬
萬幾厲精為治五日一聽事自丞相已下各奉職而進
及拜刺史守相輒親見問觀其所由退而考察所行以
質其言

質正也

有名實不相應必知其所以然常稱曰庶

民所以安其田里而亡嘆息愁恨之聲者政平訟理也
與我共此者其唯良二千石乎

謂郡守諸侯相

以為太守吏民

之本也數變易則下不安民知其將久不可欺罔廼服
從其教化故二千石有治理效輒以璽書勉厲增秩賜

金或爵至關內侯公卿缺則選諸所表以次用之

所表謂增

秩賜金爵也

是故漢世良吏於是為盛稱中興焉若趙廣漢

韓延壽尹翁歸嚴延年張敞之屬皆稱其位然任刑罰

或抵罪誅王成黃霸朱邑龔遂鄭弘召信臣等所居民

富所去見思生有榮號死見奉祀此廩廩庶幾德讓君

子之遺風矣

廩廩言有風采也

貨殖傳序

昔先王之制自天子公侯卿大夫士至於卑隸抱關擊

桺者

早養馬者也。隸之言著也。屬著於人也。抱關守其門者也。擊桺守夜擊木以警衆也。○桺吐各反。

爵祿奉養宮室車服棺槨祭祀死生之制各有差別小

不得僭大賤不得踰貴夫然故上下序而民志定於是

辨其土地川澤丘陵衍沃原隰之宜

衍謂地平延者也。沃水之所灌沃也。

廣平曰原

教民樹種畜養五穀六畜及至魚鼈鳥獸藿

蒲材幹器械之資

藿藿也。械者器之總名。○藿音桓。

所以養生送終之

具靡不皆育育之以時而用之有節草木未落斧斤不

入於山林豺獺未祭置網不布於壑澤鷹隼未擊矰弋

不施於侯隧

月令孟秋之月鷹乃祭鳥用始行戮弋射也矰者弋之矢也侯隧徑道也

既順

時而取物然猶山不槎蘖澤不伐天

在古槎字槎邪斫木也蘖斲之也

此天謂草木之方長未成者也○

螻魚麋卵咸有常禁

螻小蟲也麋鹿子也卵鳥卵也月令孟春之月母殺孩蟲母麋母卵○螻弋全反麋莫奚反

所以順

時宣氣蕃阜庶物蕃足功用如此之備也

德與蓄同

然後四

民因其土宜各任智力夙興夜寐以治其業相與通功易事交利而俱贍非有徵發期會而遠近咸足故易曰后以財成輔相天地之宜以左右民備物致用立成器

以為天下利莫大乎聖人此之謂也管子曰古之四民
不得雜處士相與言仁誼於閒宴工相與議技巧於官
府商相與語財利於市井農相與謀稼穡於田壥朝夕
從事不見異物而遷焉故其父兄之教不肅而成子弟
之學不勞而能各安其居而樂其業甘其食而美其服
雖見奇麗紛華非其所習辟猶戎翟之與於越不相入
矣是以欲寡而事節財足而不爭於是在民上者道之
以德齊之以禮故民有恥而且敬貴誼而賤利此三代

之所以直道而行不嚴而治之大略也及周室衰禮法墮諸侯刻桷丹楹大夫山節藻稅八佾舞於庭雍徹於堂其流至於士庶人莫不離制而棄本稼穡之民少商旅之民多穀不足而貨有餘陵夷至於桓文之後禮誼大壞上下相冒國異政家殊俗者欲不制僭差亡極於是商通難得之貨工作亡用之器士設反道之行以追時好而取世資偽民背實而要名姦夫犯害而求利篡弑取國者為王公圉奪成家者為雄桀

周謂禁禮誼不守其人

足以拘君子刑戮不足以威小人富者木土被文繡犬

馬餘肉粟而貧者裋褐不完含菽飲水

裋布長襦也褐編象衣也含舍

同菽豆也

○裋音豎

其為編戶齊民同列而以財力相君雖為僕

虜猶亡慍色故夫飾變詐為姦軌者自足乎一世之間
守道循理者不免於饑寒之患其教自上興由法度之
無限也故列其行事以傳世變云

游俠傳序

古者天子建國諸侯立家自卿大夫以至於庶人各有

等差是以民服事其上而下無覬覦孔子曰天下有道
政不在大夫百官有司奉法承令以修所職失職有誅
侵官有罰夫然故上下相順而庶事理焉周室既微禮
樂征伐自諸侯出桓文之後大夫世權陪臣執命陵夷
至於戰國合從連衡力政爭彊由是列國公子魏有信
陵趙有平原齊有孟嘗楚有春申皆藉王公之勢競為
游俠鷄鳴狗盜無不賓禮而趙相虞卿棄國捐君以周
窮交魏齊之厄信陵無忌竊符矯命戮將專師以赴平

原之急皆以取重諸侯顯名天下搯拏而游談者以四

豪為稱首

搯拏持也擊古腕字○搯音厄

於是背公死黨之議成守職

奉上之義廢矣及至漢興禁網疏濶未之匡改也是故

代相陳豨從車千乘而吳淠淮南皆招賓客以千數外

戚大臣魏其武安之屬競逐於京師布衣游俠劇孟郭

解之徒馳騫於閭閻權行州域力折公侯衆庶榮其名

迹覲而慕之雖其陷於刑辟自與殺身成名若季路仇

牧死而不悔也

與許也仇牧宋大夫也宋萬弑閔公仇牧聞之趨而至手劒而叱之萬臂擊仇

牧碎首齒著於門闔言游俠之徒自許節操同於季路仇牧故曾子曰上失其道民

散久矣非明王在上視之以好惡齊之以禮樂民曷由知禁而反正乎古之正法五伯三王之臯人也而六國五伯之臯人也夫四豪者又六國之臯人也況於郭解之倫以匹夫之細竊殺生之權其臯已不容於誅矣觀其溫良泛愛振窮周急謙退不伐亦皆有絕異之姿惜乎不入於道德苟放縱於末流殺身亡宗非不幸也自魏其武安淮南之後天子切齒衛霍改節然郡國豪桀

處處各有京師親戚冠蓋相望亦古今常道莫足言者
唯成帝時外家王氏賓客為盛而樓護為帥及王莽時
諸公之間陳遵為雄問里之俠原涉為魁

西域傳贊

孝武之世圖制匈奴患其兼從西國結黨南羌迺表河
曲列四郡開玉門通西域以斷匈奴右臂隔絕南羌月
氏單于失援由是遠遁而幕南無王庭遭值文景玄默
養民五世天下殷富財力有餘士馬彊盛故能睹犀布

璵璠則建珠崖七郡感枸醬竹杖則開牂柯越雋

枸音矩

聞天馬蒲陶則通大宛安息自是之後明珠文甲通犀

翠羽之珍盈於後宮蒲梢龍文魚目汗血之馬充於黃

門鉅象師子猛犬大雀之羣食於外園殊方異物四面

而至於廣開上林穿昆明池營千門萬戶之宮立神

明通天之臺興造甲乙之帳

其數非一以甲乙次第名之也

落以隨珠

和璧

落與絡同

天子負黼衣襲翠被馮玉几而處其中設酒

池肉林以饗四夷之客作巴俞都盧海中磬極漫衍魚

龍角抵之戲以觀視之

巴巴州俞渝州也巴俞之人勁銳善舞都盧國名其人體輕善

緣者也碣極樂名漫衍者即張衡西京賦所云巨獸百尋是為漫衍者也魚龍者初為大魚後變成龍皆假作以為戲也角抵者及賂遺贈送萬里相奉師旅之費不兩兩相當角力也

可勝計至於用度不足廼榷酒酤筦鹽鐵鑄白金造皮幣筭至車船租及六畜民力屈財用竭因之以凶年寇盜並起道路不通直指之使始出衣繡杖斧斷斬於郡國然後勝之是以末年遂棄輪臺之地而下哀痛之詔豈非仁聖之所悔哉且通西域近有龍堆遠則葱嶺身

熱頭痛縣度之阮淮南杜欽揚雄之論皆以為此天地所以界別區域絕外內也書曰西戎即序禹既就而序之非上威服致其貢物也西域諸國各有君長兵衆分弱無所統一雖屬匈奴不相親附匈奴能得其馬畜旃罽而不能統率與之進退與漢隔絕道里又遠得之不為益棄之不為損盛德在我無取於彼故自建武以來西域思漢威德咸樂內附唯其小邑鄯善車師界迫匈奴尚為所拘而其大國莎車于闐之屬數遣使置質於

漢願請屬都護聖上遠覽古今因時之宜羈縻不絕辭而未許雖大禹之序西戎周公之讓白雉太宗之卻走馬義兼之矣亦何以尚茲

崔駰

字季伯涿郡安平人學有偉才與班固傳毅同時齊名辟實憲府掾憲擅權驕恣駰數諫

不能容

棄官歸

誠實憲書

駰聞交淺而言深者愚也在賤而望貴者惑也未信而納忠者謗也三者皆所不宜而或蹈之者思効其區區

憤盈而不能已也竊見足下體淳淑之姿躬高明之量

意美志厲有上賢之風駟幸得充下館列後陳

陳列也

是

以竭其拳拳敢進一言傳曰生而富者驕生而貴者傲

生富貴而能不驕傲者未之有也今寵祿初隆百僚觀

行當堯舜之盛世處光華之顯時豈可不庶幾夙夜以

永終譽弘申伯之美致周邵之事乎語曰不患無位患

所以立昔馮野王以外戚居位稱為賢臣

馮野王字君卿妹為元帝

昭儀近陰衛尉克已復禮終受多福

陰衛尉光烈皇后同母弟興也

鄭氏

之宗非不尊也

史丹封鄴故云鄴氏丹祖父恭有女弟武帝時為衛太子良娣成帝即位擢丹

為長樂尉遷右將軍封武陽侯

陽侯之族非不盛也

侯當作平王鳳封陽平侯

重侯

累將建天樞執斗柄

王氏九侯五大司馬北斗七星第一名天樞第五至第七為杓杓即

柄

其所以獲譏於時垂愆於後者何也蓋在滿而不挹

位有餘而仁不足也漢興以後迄於哀平外家二十保

族全身四人而已

四人者哀帝母丁姬景帝王皇后宣帝許皇后王皇后其家族並全書

曰鑒于有殷可不慎哉竇氏之興肇自孝文二君以淳

淑守道成名先日

竇太后之弟長君少君退讓君子不敢以富貴驕人故云淳淑守道也

安豐以佐命著德顯自中興

實融封為安豐侯

內以忠誠自固

外以法度自守卒享祚國垂祉於今夫謙德之光周易所美滿溢之位道家所戒故君子福大而愈懼爵隆而益恭遠察近覽俯仰有則銘諸几杖刻諸盤杆矜矜業業無怠無荒如此則百祿是荷慶流無窮矣

樊準

字幼陵南陽湖陽人和帝幸南陽準為郡功曹召見器之拜郎中終光祿勳

勸興儒學疏

時鄧太后臨朝儒學陵替準上疏太后深納其言是後屢舉方正數

樸仁賢

之士

臣聞賈誼有言人君不可以不學故雖大舜聖德孳孳
為善成王賢主崇明師傅及光武皇帝受命中興羣雄
崩擾旌旗亂野東西誅戰不遑啓處然猶投戈講藝息
馬論道至孝明皇帝兼天地之資用日月之明庶政萬
幾無不簡心而垂情古典游意經藝每饗射禮畢正坐
自講諸儒並聽四方欣欣雖闕里之化矍相之事誠不
足言

禮記孔子射於矍相之圃蓋觀者如堵牆

又多徵名儒以充禮官如沛

國趙孝琅邪承宮等或安車結駟告歸鄉里或豐衣博

帶從見宗廟其餘以經術見優者布在廊廟故朝多皤
皤之良華首之老每譙會則論難衍衍共求政化詳覽
羣言響如振玉朝者進而思政罷者退而備問小大隨
化雍雍可嘉期門羽林介冑之士悉通孝經博士議郎
一人開門徒衆百數開門謂開一家之說化自聖躬流及蠻荒勾
奴遣伊秩訾王大車且渠來入就學八方肅清上下無
事是以議者每稱盛時咸言永平今學者蓋少遠方尤
甚博士倚席不講儒者競論浮麗忘蹇蹇之忠習譏諷

之辭

○譏諛言也
譏音踐

文吏則去法律而學詆欺

詆亦銳

錐

刀之鋒斷刑辟之重德陋俗薄以致苛刻

左傳鄭人鑄刑書叔向使

賁子產書曰今子相鄭立謗政鑄刑書人知爭端矣將棄禮而徵於書錐刀之末將盡爭之鄭其敗乎註錐刀喻小事也

昔孝文竇后性好黃老而清靜之化流景武之間

臣愚以為宜下明詔博求幽隱發揚巖穴寵進儒雅有

如孝宮者徵詣公車以俟聖上講習之期公卿各舉明

經及舊儒子孫進其爵位使續其業復召郡國書佐使

讀律令如此則延頸者日有所見傾耳者月有所聞伏

願陛下推述先帝進業之道

陳忠

字伯始沛國浚人司空寵之子論事切直終尚書令

論喪服疏

元初三年詔大臣得行三年喪服闋還職至元光中尚書令祝諷等奏以

為孝文皇帝定約禮之制光武皇帝絕告寧之典貽則萬世誠不可改宜復建武故事忠

上疏

云

臣聞之孝經始於愛親終於哀戚上自天子下至庶人尊卑貴賤其義一也夫父母於子同氣異息一體而分三年乃免於懷抱先聖緣人情而著其節制服二十五

月是以春秋臣有大喪君三年不呼其門閔子雖要經服事以赴公難退而致位以究私恩故稱君使之非也臣行之禮也自臣有大喪至此並公羊傳之文也閔子軍役事了退家致位喪次極盡私恩故君使之雖非臣從君命有禮也周室陵遲禮制不

序蓼莪之人作詩自傷曰瓶之罄矣惟壘之恥言已不

得終竟子道者亦上之恥也高祖受命蕭何創制大臣

有寧告之科合於致憂之義

寧告休謁之名吉日告凶曰寧論語吾聞夫子人未

有自致者也必也親喪乎

建武之初新承大亂凡諸國政多趣簡易

大臣既不得告寧而羣司營祿念私鮮循三年之喪以

報顧復之恩者禮義之方實為凋損大漢之興雖承衰

敝而先王之制稍以施行故籍田之耕起於孝文

文帝二年

初開籍田

孝廉之貢發於孝武

武帝元光元年初令郡國舉孝廉

郊祀之禮

定於元成

元帝成帝時匡衡韋玄成定迭毀郊祀之禮

三雍之序備於顯宗

三雍明堂辟雍

大臣終喪成於陛下

謂安帝詔大臣得行三年喪也聖

靈臺也雍和也

功美業靡以尚茲孟子有言老吾老以及人之老幼吾

幼以及人之幼天下可運於掌臣願陛下登高北望以

甘陵之思

甘陵安帝母陵

揆度臣子之心則海內咸得其所

入疏

官豈不便之竟寢忠奏而從諷等議遂著于令

容諫疏

時因災異詔舉有道公卿百僚各上封事忠以詔書既開諫爭慮言事者必多

激切或致不能容乃上疏豫通帝意

臣聞仁君廣山藪之大納切直之謀忠臣盡蹇諤之節

不畏逆耳之害是以高祖舍周昌桀紂之譬

昌入奏事高祖方擁

戚姬昌走出高祖逐得騎昌項曰朕何如主昌曰桀紂之主也上笑不之罪

孝文嘉袁盎人

丞之譏

文帝幸慎夫人盎曰陛下為慎夫人適所以禍之也獨不見人哉乎上悅

武帝納東

方朔宣室之正

武帝為董偃置酒宣室方朔曰大宣室者先帝之正處非法度之正不得入上

善元帝容薛廣德自刎之切

元帝欲御樓船廣德請從橋曰陛下不聽臣請自刎

以血汚車輪上卒從橋

昔晉平公問於叔向曰國家之患孰為大

對曰大臣重祿不極諫小臣畏罪不敢言下情不上通

此患之大者公曰善於是下令曰吾欲進善有謁而不

通罪至死今明詔崇高宗之德

高宗殷王武丁也

推宋景之誠

宋景公焚感退舍事

引咎克躬諮訪羣吏言事者見杜根成翊世

等新蒙表錄顯列二臺

謂杜根為侍御史成翊世為尚書郎也

必承風響

應爭為切直若嘉謀異策宜輒納用如其管穴妄有譏刺雖苦口逆耳不得事實且優游寬容以示聖朝無諱之美若有道之士對問高者宜垂省覽特遷一等以廣直言之路

言中使疏

安帝數遣黃門常侍及中使伯榮往來甘陵而伯榮負寵驕蹇所經郡國

莫不迎謁又霖雨積時河水湧溢百姓騷動忠上疏不省

臣聞位非其人則庶事不敘庶事不敘則政有得失政有得失則感動陰陽妖變為應陛下每引災自厚不責

臣司臣司徂恩莫以為負

徂習也言屢被恩貸不以災變為憂負也

故天心

未得隔井屢臻

隔井謂水旱不節也○井必姓反

青冀之域淫雨漏河

漏溢也

徐岱之濱海水盆溢充豫蝗蝻滋生

蝻螽子也

荆揚稻

收儉薄并涼二州羌戎叛戾加以百姓不足府帑虛匱

自西徂東杼柚將空臣聞洪範五事一曰貌貌以恭恭

作肅貌傷則狂而致常雨春秋大水皆為君上威儀不

穆臨蒞不嚴臣下輕慢貴倖擅權陰氣盛強陽不能禁

故為淫雨陛下以不得親奉孝德皇園廟

孝德皇安帝父清河王慶

也。比遣中使致敬甘陵朱軒駟馬相望道路可謂孝至

矣。然臣竊聞使者所過威權翕赫震動郡縣王侯二千

石至為伯榮獨拜車下儀體上僭侔於人主

伯榮帝乳母王聖女

也。長史惶怖譴責或邪諂自媚發人修道繕理亭傳多

設儲峙徵役無度

也。具

老弱相隨動有萬計賂遺僕從

人數百匹頓踣呼嗟莫不叩心河間托叔父之屬

河間王開

安帝清河有陵廟之尊

清河王延平也陵廟所在故曰尊

及剖符大臣

皆猥為伯榮屈節車下陛下不問必以陛下欲其然也

伯榮之威重於陛下陛下之柄在於臣妾水災之發必

起於此昔韓嫣托副車之乘受馳視之使江都悞為一

拜而嫣受歐刀之誅

韓嫣得幸武帝武帝獵上林中先使嫣乘副車從數十百騎馳視獸

江都王望見以為天子伏謁道傍嫣驅不見王怒為皇太后泣言太后銜之後嫣出入永巷以奸聞太后賜嫣

死

臣願明主嚴天元之尊正乾剛之位

天元猶乾元也

職事巨

細皆任賢能不宜復令女使干錯萬機重察左右得無

石顯泄漏之奸

石顯為中書令恐元帝一旦納用左右間已乃取一言為驗嘗被使至諸宮徵

發先白上恐漏盡宮門閉請詔開門上許之顯故投夜還詔開宮門後果有上書告顯矯詔開宮門天子聞之

笑顯泣曰陛下過私小臣屬任以事羣下無不嫉妬欲陷害者上以為然而憐之尚書納言得

無趙昌譖崇之詐

鄭崇哀帝時為尚書僕射數諫諍帝不許尚書令趙昌素諂因奏崇與宗

族通疑有奸上怒

公卿大臣得無朱博阿傅之援

哀帝時博

為丞相阿傅太后指奏免大司馬傳喜哀帝怒下博獄自殺

外屬近戚得無王鳳害

商之謀

成帝舅王鳳為大將軍專權驕僭王商為丞相論議不能平鳳陰求商短使人上書告商閨門

事商坐免商宣帝舅樂昌侯王武之子

若國政一由帝命王事每決於已

則下不得偏上臣不得干君常雨大水必當霽止四方

衆異不能為害

翟酺

字子超廣漢雒人仕至將作大匠為權貴所構廢於家

諫外戚疏

安帝始親政追感祖母宋貴人悉封其家又元舅耿寶及皇后兄弟閭顯

等擅權酺時為

尚書上疏諫

臣聞微子佯狂而去殷叔孫通背秦而歸漢

通仕秦為博士後歸

漢

彼非自疎其君時不可也臣荷殊絕之恩蒙值不諱

之政豈敢雷同受寵而以戴天履地伏惟陛下應天履祚歷值中興當建太平之功而未聞致化之道蓋遠者難明請以近事徵之昔竇鄧之寵傾動四方兼官重綬

盈金積貨至使議弄神器改更社稷豈不以勢尊威廣
以致斯患乎及其破壞頭顱墮地願為孤豚豈可得哉
夫致貴無漸失必暴受爵非道殃必疾今外戚寵幸功
均造化漢元以來未有等比陛下誠仁恩周洽以親九
族然祿去公室政移私門覆車重尋寧無摧折而朝臣
在位莫肯正議翕翕訛訛爾雅翕翕訛訛莫供職也更相佐附臣恐
威權外假歸之良難虎翼一奮卒不可制故孔子曰吐
珠於澤誰能不舍喻君之權柄外假則必競取以為已利猶珠出於澤中誰能不舍取以為

已實也此出春秋保
乾圖恐非孔子語

老子稱國之利器不可以示人

利器

謂權道也

此最安危之極戒社稷之深計也夫儉德之恭政

存約節故文帝愛百金於露臺飾帷帳於皐囊

文帝集上書囊

以為殿帷

或有譏其儉者上曰朕為天下守財耳豈得妄用

之哉至倉穀腐而不可食錢貫朽而不可較今自初政
以來日月未久費用賞賜已不可算斂天下之財積無
功之家帑藏單盡民物彫傷卒有不虞復當重賦百姓
怨叛既生危亂可待也昔成王之政周公在前召公在

後畢公在左史佚在右四子挾而維之目見正容耳聞
正言一日即位天下曠然言其法度素定也今陛下有
成王之尊而無數子之佐雖欲崇雍熙致太平其可得
乎自去年已來災譴頻數地坼天崩高岸為谷修身恐
懼則轉禍為福輕慢天戒則其害彌深願陛下親自勞
卹研精致思勉求忠貞之臣誅遠佞諂之黨損玉堂之
盛尊天爵之重割情欲之歡罷晏私之好帝王圖籍陳
列左右心存亡國所以失之鑒觀興王所以得之庶災

害可息豐年可招矣

虞詡

字升卿陳國武平人為朝歌長拜武都太守遷司隸校尉終尚書令

請復三郡疏

安定北地上郡遭羌亂郡縣皆荒詡上疏請復從之使謁者督徙者

各歸本縣繕城郭置候驛又浚渠屯田省費歲以億計遂令諸郡儲粟周數年

臣聞子孫以奉祖為孝君上以安民為明此高宗周宣所以上配湯武也禹貢雍州之域厥田惟上且沃野千里穀稼殷積又有龜茲鹽池以為民利水草豐美土宜產牧牛馬銜尾羣羊塞道北阻山河乘院據險因渠以

溉水春河漕

以水為碓由河轉漕也

用功省少而軍糧饒足故孝

武皇帝及光武築朔方開西河置上郡皆為此也而遭
元元無妄之災衆羌內潰郡縣兵荒二十餘年夫棄沃
壤之饒損自然之財不可謂利離河山之阻守無險之
處難以為固今三郡未復園林單外而公卿選懦容頭
過身張解設難但計所費不圖其安宜開聖德考行所
長

左雄

字伯豪南郡涅陽人安帝時為冀州刺史
永建初徵拜議郎再遷尚書令司隸校尉

上順帝陳吏事疏

雄以守長數易非政之體上疏切陳帝感其言申下有司

考其真偽詳所施行而官豎擅權終不能用

臣聞柔遠和邇莫大寧人寧人之務莫重用賢用賢之道必存考黜是以臯陶對禹貴在知人安人則惠黎民懷之分伯建侯代位親民民用和穆禮讓以興故詩云有淪淪興雨祁祁雨我公田遂及我私及幽厲昏亂不自為政褒貶用權七子黨進

七子謂卿士皇父司徒番冢宰家伯膳夫仲允

內史聚子趣馬蹶師氏搗也

賢愚錯緒深谷為陵故其詩云四國無

政不用其良又曰哀今之人胡為虺蜴言人畏吏如虺蜴也宗周既滅六國并秦阬儒泯典剗革五等更立郡縣剗削也五等謂諸侯縣設令長郡置守尉什五相司封豕其民史記商鞅為秦定變法之令令人什五而相收司犯禁相連坐不告姦者要斬楊雄長楊賦曰秦竄竄其士封豕其人也大漢受命雖未復古然克慎庶官蠲苛救敝悅以

濟難撫而循之至於文景天下康乂誠由玄靖寬柔克慎官人故也降及宣帝興於仄陋綜覈名實知時所病刺史守相輒親引見考察言行信賞必罰帝乃歎曰民

所以安而無怨者政平吏良也與我共此者其唯良二千石乎以為吏數變易則下不安業久於其事則民服教化其有政理者輒以璽書勉勵增秩賜金或爵至關內侯公卿缺則以次用之是以吏稱其職人安其業漢世良吏於茲為盛故能降來儀之瑞建中興之功

宣帝時鳳

鳳五至因以紀年

漢初至今三百餘載俗浸彫敝巧偽滋萌下

飾其詐上肆其殘典城百里轉動無常各懷一切莫慮長久謂殺害不辜為威風聚斂整辦為賢能以理已安

民為劣弱以奉法循理為不化髡鉗之戮生於睚眦覆

尸之禍成於喜怒視民如寇讐稅之如豺虎

國語鬬丹廷見令尹

子常與之語問畜貨聚馬歸語其弟曰楚其亡乎吾見令尹如餓獸豺虎焉殆必亡者也

監司項背

相望

謂前後相顧也

與同疾疢見非不舉聞惡不察觀政於亭

傳責成於期月言善不稱德論功不據實虛誕者獲譽

拘檢者離毀

離遭也

或因罪而引高或色斯以求名

因罪潛遁

以求高尚之名論語曰色斯舉矣言觀前人之顏色也

州宰不覆競其辟召踴躍

升騰超等踰匹或考奏捕案而亡不受罪會赦行賂復

見洗滌朱紫同色清濁不分故使姦猾枉濫輕忽去就

拜除如流缺動百數鄉官部吏職斯祿薄

斯賤也

車馬衣

服一出於民廉者取足貪者充家特選橫調

調徵也

紛紛

不絕送迎煩費損政傷民和氣未洽災眚不消咎皆在

此今之墨綬猶古之諸侯

墨綬謂令長即古子男之國也

拜爵王庭輿

服有庸

庸常也

而齊於匹豎叛命避負非所以崇憲明理

惠育元元也臣愚以為守相長吏惠和有顯效者可就

增秩勿使移徙非父母喪不得去官其不從法禁不式

王命錮之終身

式用也

雖會赦令不得齒列若被劾奏亡

不就法者徙家邊郡以懲其後鄉部親民之吏皆用儒

生清白任從政者

任堪也。人林反。

寬其負筭

負欠也。筭口錢也。儒生未有品

秩故寬之增其秩祿吏職滿歲宰府州郡乃得辟舉如此威

福之路塞虛偽之端絕送迎之役損賦斂之源息循理之吏得成其化率土之民各寧其所追配文宣中興之

軌

文帝宣帝也。文帝遭呂氏難故亦云中興。

流光垂祚永世不刊

郎顗

字雅光北海安丘人父宗學京氏易善風角星筭。顗少傳父業兼明經典陽嘉中徵拜郎

中不就歸家後
為同里人所殺

上災異封事

順帝時災異屢見公
車徵顓乃詣闕拜章

臣聞天垂妖象地見災符所以譴告人主責躬修德使
正機平衡流化興政也易內傳曰凡災異所生各以其
正變之則除消之亦除

易稽覽圖之
言正政也

伏惟陛下躬日昃

之聽溫三省之勤思過念咎務消祇悔

祇大也易復卦
初九曰無祇悔

元吉方今時俗奢佚淺恩薄義夫救奢必於儉約拯薄無

若敦厚安上理人莫善於禮修禮遵約蓋惟上興革文

變薄事不在下故周南之德關睢政本本立道生風行

草從澄其源者流清涵其本者末濁天地之道其猶鼓

簫以虛為德自近及遠者也

簫如笛六孔內虛而氣無窮

伏見往年

以來園陵數災

陽嘉元年冬恭陵百丈廡災永建元年秋茂陵園寢災

炎光熾猛

驚動神靈易天人應曰君子不思遵利茲謂無澤厥災

孽火燒其宮又曰君高臺府犯陰侵陽厥災火又曰上

不儉下不節災火竝作燒君室自頃繕理西苑修復太

學

永建六年修太學也

宮殿官府多所構飾昔盤庚遷殷去奢即

儉夏后卑室盡力致美又魯人為長府閔子騫曰仍舊
貫何必改作臣愚以為諸所繕修事可省減稟卹貧人
賑贍孤寡此天之意也人之慶也仁之本也儉之要也
焉有應天養人為仁為儉而不降福者哉土者地祇陰
性澄靜宜以施化之時敬而勿擾竊見正月以來陰閤
連日易內傳曰久陰不雨亂氣也蒙之比也蒙者君臣
上下相冒亂也又曰賢德不用厥異常陰夫賢者化之
本雲者雨之具也得賢而不用猶久陰而不雨也又頃

前數日寒過其節水既解釋還復凝合夫寒往則暑來

暑往則寒來此言日月相推寒暑相避以成物也今立

春之後火卦用事當溫而寒違反時節由功賞不至而

刑罰必加也宜須立秋順氣行罰臣伏案飛候叅察衆

政

京房作易飛候

以為立夏之後當有震裂涌水之害又比熒

惑失度盈縮往來涉厯輿鬼環繞軒轅

天官書曰輿鬼南方之宿軒轅

後宮之象也

火精南方夏之政也政有失禮不從夏令則熒

惑失行

熒惑南方主夏為禮為視禮虧視失不行夏令則熒惑逆行也

正月三日至乎

九日三公卦也

凡卦法一為元士二為大夫三為三公四為諸侯五為王位六為宗廟分卦直

日之法又主一日即三日九日竝為三公之日也

三公上應台階下同元首

君為

元首臣作股肱言三公上象天之台階下與人君同體也

政失其道則寒陰反節節

彼南山詠自周詩股肱良哉著於虞典而今之在位競

託高虛納累鍾之奉忘天下之憂棲遲偃仰寢疾自逸

被策文得賜錢即復起矣何疾之易而愈之速以此消

伏災膏興致升平其可得乎今選舉牧守委任三府

三公

也長吏不良既咎州郡州郡有失豈得不歸責舉者而

陛下崇之彌優自下慢事愈其所謂大綱疎小綱數


謂緩

於三公切
於州郡也

三公非臣之仇臣非狂夫之作所謂發憤忘

食懇懇不已者誠念朝廷欲致興平非不能面譽也臣
生長草野不曉禁忌披露肝膽書不擇言伏鑽鼎鑊死
不敢恨謹詣闕奉章伏待重誅

御選古文淵鑒卷十九



總校官庶吉士

臣張能照

校對官助教

臣汪錫魁

謄錄監生

臣沈浩